

Suonjadan lagešvuvddiid ja šattolaš suovkkaid gaskkas čábbát šnjuohpardeaddji duottarjogaža gáddeguora. Rievssatcizáš skájaidahtá virkos, muhto veaháš morašmielalaš šuoŋas juoga lagaslageža gierragis, muhto bissu čiegusin mu čalbmegeahčastagas. Boallorásiid fiskes lieđit deivet mu čalmmiide šattolaš rođu muđuid ruonás šaddogearddis. Dán rođus lea juoga ravddamus čábbodat ja njuorasvuohta, muhto seammás vilda eallinvuoibmi. Dat, mii oažžu luonddu ealáskit ain ođđasit gidđat guhkes dálvvi maŋnel. Dat, mii oažžu ealániid joatkit šaddama ja gildát, jagis nubbái, váttisvuođaidnai maŋnel.

Jogaš nohká váre vuolde, nu ahte biebma stuora ábi ja bajásdoallá dan earenoamáš eallima. Duolmmadan vujohatjeakki dan guvlui. Guohcadakŋasat levget gárihuhtti hájaset birrasasaset. Suddančáziin njuoska guovdojeahkálát lešket stevveliid vuolde. Beaivi lea vel vuollin ja duddjo vujohatjeaggái čappa čuovgga ja suoivana stohkosa. Áigahaš soarvvit ceaggájit silban njozet šaddi beziid ja sogiid gaskkas. Okta dain gidde mu fuomášupmán, aivve earenoamáš fiinna máŋggačuohtejahkásaš beahci. Dasa geahčadettiinan mu gudnejahttin bohciida. Boares áika lea oaidnán máŋga čuohtejagi, ceavzán čuđiin dálvviin ja eará geahččalusain, ja dál lea beassan viimmat muossánit, dattetge lea ain ruoktun ođđa lodde- ja boatkadivrebuvvaide.

Go muorahis jeaggi álgá de sirdásan vázzit vuollegis danasšattuid šaddi viiddes mohkohalli ábiid mielde. Virkos ruonájuolčoavžžu boahtá dakkaviđe gulahit munnje ahte son lea dáppe. Sirdásan lášmadit guhkelii, in háliit muosehuhttit dan besseráfi. Giellavealgu vizarda čappa, čuoddjilis ja máŋggaivnnat lávllu jeaggebeazi oavssi nalde. Geahčan unna cizázačča guhká. Dan njulgestaga čikŋageađgelágan, čappa alit čotta ja ruostaoránša uvjjat dan vulobealde šlitnjot beaivváščuovggas. Njuvčča luohiti, dan vilda roaŋgin, skájiha guovdu gidđačáziin bárusteaddji stuora njeašši, dan unna balsasulložis. Doppe duot čappa, muhtavilges 'ulthima thule loddi 'bállelii šaddadit čivggaidis ráfis eananbeađuin ja ilá árjjalaš vánddardeddjiin. Datnai measta sogahuvai olbmo julbmivuođa ja áberávkku dihte, muhto lihkus dien galgamušas beastahuvai, nuppe ládje go máŋggas – aivve liiggás máŋggas – eará lagamuččaineamet.

Geahčan fiinna duovdaga iežan birra. Stuora, eallima guđaideaddji ábi, miljovnnaid dán planehta ásaiduhtti ealániid ruovttu. Dan ravddain ceagganeaddji boares luondduvidá vuovddi, dan máŋggaahkásaš muoraid, máŋggaid jagiid oaidnán guossaboaraniin nuorra, eallima joatkima lohpadalli lánjáide. Buot dán bajábeallái vuovddis allánaddi rámšoduoddarat ja várit, mat leat čužžon das máŋggaid duhátjagiid, maid birra dát duovdda lea jiekŋaáiggi maŋnel hápmahuvvan. Eallima fierpmi, juoidá dušše olbmo mihá stuoribu. Vuogádaga, mas buohkat leat oktavuodas nuppiidasaset, ja juohke orut dárbbaha nuppi. Man oassin olmmošnai lea; mas olmmoš galggalii eallit soabalašvuodas eará šlájaguin.

Mikael Särkelä